

池田草庵先生に学ぶ会・学習資料・令和三年九月より

① 古人有言曰、人無父母、生日當倍悲痛、
七月廿三日、余生日也、晨起端坐、因憶、吾父母皆不幸早世、
去今已十餘年矣、如使父母存於今、則父年五十九、母年五十二、
髮未全白、齒未全落、身體未全衰憊、

② 而緝亦今日尚非無怙恃者也、緝嚮歸山陰、展省墳墓、臨去、
吾父母之親友故舊、相集留緝曰、莫遠游、必莫勤苦作疾、
即使吾父母在、則其於緝者何如哉、必不使緝得遠游如今日矣、
而緝亦愛戀顧望、（不能須臾去其側也、）

③ 不能須臾去其側也、緝每讀古人書、誦古人詩、
至其父子相樂之際、徘徊唱咏、常必三復、
而或過人家、見父子對案而食者、
緝乃慨然亦有以想當日之歡也、且近年以來、

④ 吾宗災禍薦臻、產稍不如舊、則吾父母之遺物、
或不能悉保之、而二三兄弟、皆早離慈訓、則閨閣之內、
或不能無時失和、悲感交集、憂思鬱塞、深夜起坐、
不覺涕泗之沾襟也、詩不云乎、

⑤ 夙興夜寐、莫忝爾所生、在緝之身、所以報父母者、
今日惟有此一路耳、讀書立志、以成我業、必不可怠也、
此日又取蓼莪凱風等詩、反覆誦之、終日愀然云、
天保丙申七月廿三日、池田緝記

（「生日記」 ○番号は学習上の便宜のためつけている）